

MUKANDA UTANGU WA MOSE

Uze Akuvuluka Ngwo

UPUTUKILO

1 Ha uputukilo Zambia watangile malilu ni hashi. 2 Hashi hapwile hahululu kanda hamokomoko mba helu lia jondo hapwile milima. Spiritu ya Zambia wapwile nikujingajinga helu lia meya.

3 Zambia yamba ngwenyi, Kupwe pangu, mba yikupwa pangu. 4 Zambia yamona pangu, ngwenyi, Linapeme, mba Zambia yahandununa hakachi ka pangu ni milima. 5 Zambia yaluka pangu ngwenyi, Tangwa. Milima yayiluka ngwenyi, Ufuku. Yikupwa chingoloshi, yikupwa chimene, tangwa litangu.

6 Mba Zambia yamba ngwenyi, Hakachi ka meya hapwe kuzazuluka chikahandunune meya ni meya. 7 Zambia yatanga kuzazuluka, yahandununa meya a kushi lia kuzazuluka ni meya a helu lia kuzazuluka, yichipwa chocho. 8 Zambia yaluka kuzazuluka ngwenyi, Lilu. Yikupwa chingoloshi, yikupwa chimene, tangwa liamuchiali.

9 Zambia yamba ngwenyi, Meya aze ali kushi lia lilu aswile muma mumuwika, mavu omu asoloke. Yichipwa chocho. 10 Zambia yaluka mavu omu ngwenyi, Hashi. Kuswila cha meya yachiluka ngwenyi, Kalunga-lwiji, mba Zambia yachimona ngwenyi, Chinapeme. 11 Zambia yamba ngwenyi, Ha mavu hasoke mwambu, ni yiputa yakwima mbuto, ni mitondo ya mihuko yize yakwima mihuko nikulita ni milali yayo, yize yikwete mbuto yayo muchima ha mavu. Yichipwa chocho. 12 Mba ha mavu hasokele mwambu, ni yiputa yakwima mbuto nikulita ni milali yayo, ni mitondo yakwima mihuko yikwete mbuto yayo muchima nikulita ni milali yayo. Mba Zambia yachimona ngwenyi, Chinapeme. 13 Yikupwa chingoloshi, yikupwa chimene, tangwa liamuchitatu.

14 Zambia yamba ngwenyi, Kupwe mapangu mwilu akahandunune mwalwa ni ufuku. Akapwe yilayi, ha tungonde, ni ha matangwa, ni ha miaka. 15 Akapwe mapangu mwilu mukupangwisa hashi. Mba yichipwa chocho. 16 Zambia yatanga e mapangu aali anene; pangu linene likayule mwalwa, pangu likepe likayule ufuku. Yatanga matongonoshi nawa. 17 Zambia waasele mwilu mukupangwisa hashi. 18 Akayule ha mwalwa ni ha ufuku, akahandunune hakachi ka pangu ni milima. Mba Zambia yachimona ngwenyi, Chinapeme. 19 Yiku-

pwa chingoloshi, yikupwa chimene, tangwa liamuchiwana.

20 Zambia yamba ngwenyi, Meya akazale ni yizavu ya akwa mwono. Tujila akahumuke helu lia hashi mu kuzazuluka cha lilu. 21 Zambia yatanga tushitu anene a mu kalunga-lwiji, ni akwa mwono eswe aze a kuliokesa mu meya nikulita ni mavungu jo, ni akwa mapulwa eswe nikulita ni mavungu jo. Mba Zambia yachimona ngwenyi, Chinapeme. 22 Mba Zambia yaawahisa ngwenyi, Semenu nuliokese, nukazalise meya a mu kalunga-lwiji. Tujila aliokese hashi. 23 Yikupwa chingoloshi, yikupwa chimene, tangwa liamuchitano.

24 Zambia yamba ngwenyi, Hashi hazale ni akwa mwono nikulita ni mavungu jo, ni yimuna, ni akwa kukalala, ni tushitu a hashi nikulita ni mavungu jo. Mba yichipwa chocho. 25 Zambia yalinga tushitu a hashi nikulita ni mavungu jo, ni yimuna nikulita ni mavungu jo, ni akwa kukalala eswe nikulita ni mavungu jo. Mba Zambia yachimona ngwenyi, Chinapeme.

26 Zambia yamba ngwenyi, Tulingenu mutu mu chano chetu, mwe mu kulifwa chetu. Akapwe ni chiyulo helu lia yishi a mu kalunga-lwiji, ni helu lia tujila a mwilu, ni helu lia yimuna, ni helu lia hashi heswe, ni helu lia akwa kukalala eswe aze akukalala hashi. 27 Mba Zambia yatanga mutu mu chano chenye; mu chano cha Zambia yamutanga. Lunga ni pwo yaatanga. 28 Mba Zambia yaawahisa. Zambia yamba kuli ayo ngwenyi, Semenu nuliokese, nukazalise hashi, nukazeyeseho. Nukapwe ni chiyulo helu lia yishi a mu kalunga-lwiji, ni helu lia tujila a mwilu, ni helu lia tushitu eswe akwenda hashi. 29 Zambia yamba ngwenyi, Talenu hinanwaha yiputa yakwima mbuto yili hashi heswe, ni mitondo yeswe yize yikwete mihuko yakwima mbuto. Yeswe muyipwa ya kulia kuli yenu. 30 Ni kuli tushitu eswe a hashi, ni tujila eswe a mwilu, ni eswe akukalala hashi akwete mwono, hinaaha yiputa ya wisu ya kulia. Mba yichipwa chocho. 31 Mba Zambia yamona yuma yeswe yize halinga ngwenyi, Chinapeme chikolo. Yikupwa chingoloshi, yikupwa chimene, tangwa liamuchisambano.

2 Chocho mwilu ni hashi yayimanuna, ni chizavu chayo cheswe. 2 Ha tangwa liamuchishimbiali Zambia yamanuna milimo

yenyi yize alingile, mba ha tangwa liamuchishimbiali yahwima ku milimo yenyi yeswe yize alingile. 3 Zambi yawahisa tangwa liamuchishimbiali, yalisela lisandu, mumu ha lienalio yahwima ku milimo yenyi yeswe yize Zambi atangile ni yize alingile.

4 Yisemuko ya mwilu ni hashi yino ha tangwa lize Yehova Zambi yalinga mwilu ni hashi.

5 Ni mitondo yeswe ya mu mavu shimbu kanda yipwa hashi, ni yiputa yeswe ya mu mavu shimbu kanda yisoka, mumu Yehova Zambi kanda anokesa vula hashi, chipwe mutu keshiko yoze machipa mavu. 6 Alioze kwakakumukine mbundu hashi nikutuchikisa heswe ha mavu. 7 Yehova Zambi yawumba mutu wa ku fufuta ya mavu, yahwima mu mazulu jenyi mwiku wa mwono mba mutu yapwa mukwa¹ mwono. 8 Yehova Zambi yatumba munda ku chivumbuko, mu Endene, mwenamo asele mutu yoze awumbile. 9 Mba ku mavu Yehova Zambi yasokesa mitondo yeswe yipema ku meso, ni yize yipema ya kulia; mutondo wa mwono nawa mukachi ka munda, ni mutondo wa chinyingi cha chipema ni chipi.

10 Lwiji yakatuka ku Endene muku-tuchikisa munda, mba ku kuze yalipula njiji jiwana. 11 Jina lia lwiji mutangu Pishone, mwenawo wajingilika chifuchi cheswe cha Havila kuze kwatwama oru. 12 Oru yize yipema chikolo. Kuli nawa ndeliume ni mawe a sardonica. 13 Jina lia lwiji wamuchiali Ngehona, mwenawo wajingilika chifuchi cheswe cha Kushe. 14 Jina lia lwiji wamuchitatu Hidekele, mwenawo wapalika ku Chivumbuko ku Asuria. Lwiji wamuchiwana Ufrateze.

15 Mba Yehova Zambi yatwala mwe mutu, yamusa mu munda wa Endene mukuulima nikuufunga. 16 Yehova Zambi yamba kuli mwe mutu ngwenyi, Ku mitondo yeswe ya mu munda muhasa kulia chawana, 17 alioze ku mutondo wa chinyingi cha chipema ni chipi, kanda uliako, mumu ha tangwa muoliako kumukafwa lume.

18 Mba Yehova Zambi yamba ngwenyi, Kuchapemene mutu akatwame ukawenyi, mungumulingila chikwashi yoze malita nenyi. 19 Ku mavu Yehova Zambi yawumba tushitu eswe a mu yambu, ni tujila eswe a mu tetela, yaaneha kuli mwe mutu akamone chize maaluka. Lieswalio mutu alukile kashitu ni kashitu, lienalio jina lienyi. 20 Mutu yaluka majina yimuna eswe, ni tujila a mu tetela, ni tushitu eswe a mu yambu, hindu hali mwe mutu kawanyine ni umwe chikwashi yoze walita nenyi. 21 Yehova Zambi yatuma tulo anji kuli mwe mutu akaye tulo, mba yanda umwe lupachi wenyi, yanungisa yifwo kumusalakana, 22 mba mwe lupachi

¹ Pundu, Alma ya mwono.

yoze Yehova Zambi yachiza kuli mutu yamulinga pwo, yamuneha kuli mwe mutu. 23 Mba mutu yamba ngwenyi,

Yono chifwaha cha ku yifwaha yami; musunya wa ku musunya wami;

Yamuluka jina ngwenyi, Pwo, mumu yamuchiza kuli Lunga.

24 Kashika lunga mahichika tato ni naye akalalaminye kuli mukwo-pwo, mba kumapwa musunya umuwika. 25 O eswe aali apwile ni uselesele, ni lunga ni mukwo-pwo, hindu kewwile sonyi.

3 Achi kapela wakanyamine kuhiana tushitu eswe a mu yambu aze Yehova Zambi yatanga. Iye yamba kuli pwo ngwenyi, Kuma, Zambi hanambe ngwenyi, Kanda nukalia ku mitondo yeswe ya mu munda nyi? 2 Pwo yamba kuli kapela ngwenyi, Ku mitondo yeswe ya mu munda tunahase kulia. 3 Alioze ku mihuko ya mutondo uze uli mukachi ka munda, Zambi hanambe ngwenyi, Kanda nuyilia, chipwe kukwatako, kuchina munufwa. 4 Kapela yamba kuli pwo ngwenyi, Kufwa kunuchi kufwa, 5 mumu Zambi kananyingika ngwenyi, Ha tangwa lize munuliako meso jenu malaula, munupwa ngwe Zambi, nikunyingika chipema ni chipi. 6 Muze pwo yamona ngwenyi, Mutondo upema wa kulia, chikwo nawa unawaha ku meso, mutondo wa kuzanga hanga akapwe ni mana, yahelako mihuko, yalia. Yahana nawa kuli mukwo-lunga hamwe nenyi, neye yalia. 7 Mba meso jo yalaula, eswe aali yanyingika ngwo, Uselesele tuli. Yatanga mafwo a mukuyu akaatenge miswele.

8 Aho yevwa liji lia Yehova Zambi kanende mu munda ha kukekema cha tangwa, kashika lunga ni mukwo-pwo yaswama kumeso ja Yehova Zambi hakachi ka mitondo ya mu munda. 9 Mba Yehova Zambi yatabika kuli Alama ngwenyi, Kulihi uli? 10 Iye yakumulula ngwenyi, Nevwa liji lie mu munda mba nevwa woma mumu uselesele nguli, kashika naswama. 11 Zambi yamba ngwenyi, Iya wakulweza ngwenyi, Uselesele uli? Hiwalia ku mutondo uze nakukanjishile ngwami, Kanda uliako, nyi? 12 Lunga yamba ngwenyi, Pwo wanguhele akapwe hamwe ni yami, iye wangwahanga wa ku mutondo mba nalianga. 13 Mba Yehova Zambi yamba kuli pwo ngwenyi, Achi hiwalinga chika? Pwo yakumulula ngwenyi, Mwe kapela wangwonganga mba nalianga. 14 Yehova Zambi yamba kuli kapela ngwenyi,

Mumu hiwalinga chuma chino

kashika kuwashingiwa kuhiana yimuna eswe

ni tushitu eswe a mu yambu.

Ha jimo lie mukenda, ukalie fufuta matangwa eswe a mwono we.

UPUTUK

- 15 Chikwo nawa mungusa kole hakachi ka yena ni pwo; hakachi ka munyachi we ni munyachi wenyi. Mukwa munyachi wenyi makawonda mutwe we, ni yena mukawonda kashijino kenyi.
- 16 Kuli pwo yamba ngwenyi, Mungwokesa chikolo chinyengo che ni kwaka che. Musema ana ni yikola; mbunge ye muyipwa kuli mukwenu-lunga, iye kumakakuyula.
- 17 Kuli Alama yamba ngwenyi, Mumu yena hiwatayiza liji lia mukwenu-pwo hiwalia ku mutondo uze nakukanjishile ngwami, Kanda uliako, mavu kanashingiwa ha mukunda wa yena. Mukaliako ni kuhondangana wika matangwa eswe a mwono we.
- 18 Mbimbo nawa ni mikalale muyikakusokela, mba mukalia yilimalima ya ha mavu.
- 19 Mukalia ni matukuta a ku meso je ndo mukahiluka mu mavu se kuze kwene akuchijile. Mumu uli fufuta mba ku fufuta mukahilukila.
- 20 Mba lunga walukile mukwo-pwo jina ngwenyi, Eva, mumu iye naye ya akwa mwono eswe. 21 Mba Yehova Zambi wato-ngelele Alama ni mukwo-pwo yikuto ya malambu akaajike.
- 22 Yehova Zambi yamba ngwenyi, Kumanyi mutu hapwa ngwe yetu, nikunyingika chipema ni chipi, kashika kuchina mazozo kwoko lienyi akabele nawa ku mutondo wa mwono akalie, akatwame ni mwono miaka yeswe . . . 23 kashika Yehova Zambi yamukatwisa mu munda wa Endene akalime mavu kuze amuchijile. 24 Mba yahuma mutu, yasa ku sali lia Chivumbuko lia munda wa Endene akerupimi ni katana wa mulengi wa kutalikisa majila eswe kufunga jila ya mutondo wa mwono.

MUKANDA USANDU WA ZAMBI

Usendo Ukulu ni Usendo Waha